

VENDIM
Nr.447, datë 9.7.2004

PËR PËRCAKTIMIN E GJENDJES SË TË SËMURIT QË KA NEVOJË PËR NDIHMË
URGJENTE, SI DHE DOKUMENTACIONI I NEVOJSHËM PËR MBULIMIN E
SHPENZIMEVE TË BËRA

Në mbështetje të nenit 100 të Kushtetutës dhe të pikës 3 të nenit 6 të ligjit nr.9106, datë 17.7.2003 “Për shërbimin spitalor në Republikën e Shqipërisë”, me propozimin e Ministrit të Shëndetësisë, Këshilli i Ministrave

VENDOSI:

1. T’u jepet ndihmë mjekësore urgjente në spital të sëmurëve, që paraqiten me këtë gjendje klinike:

- Vështirësi frymëmarrjeje të çdo tipi;
- Humbje të ndërgjegjies;
- Dhimbje koke, paralizë, konvulsione të rënda e të menjëhershme;
- Dhimbje ose shtrëngim të gjoksit;
- Dhimbje të menjëhershme të barkut;
- Hemoragji masive;
- Fraktura;
- Dëmtime nga përplasjet me mjete motorike ose me armë;
- Dëmtime të kokës ose qafës;
- Dehidratim të rëndë;
- Gjendje të axhitimit psikomotor.

2. Dokumentet e nevojshme për llogaritjen e shpenzimeve të bëra gjatë dhënies së ndihmës mjekësore urgjente janë:

- Kartela e shërbimit të urgjencës;
- Dokumenti i identifikimit të pacientit;
- Libreza e sigurimit shëndetësor të pacientit.

3. Këto dokumente kërkohen, plotësohen dhe verifikohen, detyrimisht, në urgjencë, pas dhënies së ndihmës urgjente. Në rastet kur pacienti nuk është i shoqëruar me familjarë, plotësimi i këtyre dokumenteve bëhet në pavion.

4. Llogaritja e shpenzimeve bëhet sipas përcaktimeve të parashikuara në urdhrin e drejtorit të spitalit.

5. Ministri i Shëndetësisë miraton modelin e udhëzuesit klinik dhe të kartelës së pacientit për shërbimin e urgjencës, të hartuara nga klinikat universitare përkatëse.

6. Ngarkohet Ministri i Shëndetësisë për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI
Fatos Nano